

Izjava OHR-a na konferenciji za medije međunarodnih organizacija u Mostaru

Upravni odbor Vijeća za implementaciju mira stavit će naglasak na saradnju sa Međunarodnim Tribunalom za ratne zločine u Hagu, te moguću krizu budžeta BiH

Upravni odbor Vijeća za implementaciju mira će se sutra sastati u Briselu pod predsjedavanjem Paddyja Ashdowna, Visokog predstavnika. Na sastanku će izvještaje o situaciji podnijeti glavna tužiteljica Međunarodnog suda za ratne zločine, Carla del Ponte, te premijer Adnan Terzić koji predvodi delegaciju BiH Vlade.

Na sastanku će se pažnja posvetiti još uvijek nezadovoljavajućem stepenu saradnje BiH sa Tribunalom u Hagu. To je u ovom trenutku najozbiljnija preostala prepreka koja stoji pred BiH na putu pridruživanja Partnerstvu za mir i početku pregovora o stabilizaciji i pridruživanju sa Evropskom Unijom.

Na sastanku će se također razmotriti i mjere koje će trebati hitno poduzeti da se riješi predstojeća kriza Budžeta BiH . Više od 50% bruto domaćeg proizvoda trenutno ide na javne troškove. Nepravilan administrativni sistem kojeg vode općine, kantoni, entiteti i državne vlasti ukazuje na ogromno dupliranje rada, te tako i dupliranje samih troškova. BiH ne može priuštiti da se takav sistem održi – do kraja ove godine vlasti se mogu naći u situaciji da nisu u mogućnosti izmiriti plate i pokriti druge obaveze. Stoga će trebati preduzeti korake u prvoj polovini 2005. godine kako bi se iznašli načini da se smanji birokratija, reducira broj zaposlenih u tijelima vlasti i osigura da se resursi dodjeljuju onim nivoima vlasti koji mogu pružiti najbolje usluge građanima.

Pojedinosti iz zaključaka Vijeća za implementaciju mira bit će izložene u komunikeu, kojeg ćemo pokušati distribuirati do sutra u 6 sati poslijepodne.